

SOLENITÂT DE SENSE

Jutoris pe Liturgjie

Domenie, ai 13 di Mai dal 2018

Domenie passade o vin ricuardât il taramot: chel taramot che al à scjavaçade la storie dal popul furlan tun prin e tun dopo; chei che a àn viodût i paîs di prin no ricognossaressin chei di dopo e chei di dopo no ricognossaressin chei di prin.

Un fat che no si è risolt tune dî, che al à durât tai agns e al à cognossût, riunions, incuintris, sembleis, dibatits di tante int, volantins e ciclostilâts a no finî.

Ma a un taramot o podaressin paragonâ ancje la solenitât de Sense che vuê o celebrìn. Jê e à segnât la vite dai apuestui tun prime e tun dopo, parcè che un cont e jere la persone e la presince di Gjesù prime de muart e un cont dopo de resurezion.

Dut chest nus ven pandût in tantis imagjinis, presincis, discors di Gjesù che ancje lis leturis di vuê a mût lôr nus proponin.

La sostanza di dut e je cheste: Il Pari al à gradide la vite dal so servidôr Gjesù di Nazaret, al à cjalât al so amôr crocifis par nô e lu ricêf a plen dirit te sô glorie.

Chest, al di là e al di sore di tantis imagjinis al è il misteri de Sense che vuê o stin celebrant.

Pal moment o vignìn visâts ancje nô, come i dissepui dal Signôr: umign di Galilee...

Antifone di jentrade

At 1,11

Umign di Galilee, parcè po staiso li a cjalâ il cîl?

Come che lu vês viodût a lâ sù viers il cîl,

cussì al tornarà, aleluia.

Si dîs Glorie a Diu.

Colete

Diu onipotent, fasinus gjoldi di sante contentece

e cuntun agrât plen di religjon,

parcè che la sense di Crist to Fi e je ancje la nestre

e là ch'e je rivade la glorie dal cjâf,

li al è clamât a sperâ ancje il cuarp.

Pal nestri Signôr Gjesù Crist to Fi, ch'al è Diu

e cun te al vîf e al regne dutune cul Spirtu Sant,

par ducj i secui dai secui.

O ben:

Diu onipotent, a nô ch'o crodin

che come vuê il to Unigjenit e nestri Redentôr

al è lâf sù intai cîi;

danus, par plasê, di vivi ancje nô lassù cul nestri cûr.

Lui ch'al è Diu

e cun te al vîf e al regne dutune cul Spirtu Sant,

par ducj i secui dai secui.

PRIME LETURE

At 1,1-11

Si è alçât par aiar sot i lôr vôi.

O podaressin clamâle une "cronache" lineâr, contemplative, serene, dai fats sucedûts. I studiâts a cjamin pluitost une ricostruzion catechetice, fate di imagjinis e sul stamp de vite tal profete Elie

che...biel che Elie e Liseo a levin indenant resonant, ve che un cjar di fûc e cjavai di fûc si meterin jenfri dai doi e Elie al lè su in cîl tal burlaç (Re 2, 11).

Nô si svicinìn come simpri cun tant respìet a chest resocont dai corante dîs dopo Pasche e o cjalìn al Signôr che ur à dât lis sôs istruzions, ur fevelave dal ream di Diu, ju visave che a saressin stâts batiâts cul Spirtu Sant e ur diseve mi sarès testemonis... fin cuant che un nûl ur al strafuì dai lôr vôi.

Intant che o cjalìn viers dal cîl, il Signôr stes, te sô misericordie, che al meti un lum di dut chest tai nestrîs cûrs.

Dai Ats dai Apuestui

Tal gno prin libri, Teofil, o ai tratât di dut ce che Gjesù al à fat e insegnât, di cuant ch'al à scomençât fint in chê di ch'al è stât puartât sù in cîl, dopo di vêur dât lis sôs istruzions ai apuestui che ju veve sielzûts midiant dal Spirtu Sant.

Dopo de sô passion, lui si è pandût a lôr vîf, cun cetantis provis, comparintjur par corante dîs e fevelantjur dal ream di Diu. E biel ch'al mangjave cun lôr, ur à comandât di no slontanâsi di Gjerusalem ma di spietâ li ce che il Pari ur veve imprometût, «ce ch'o vês sintût, dissal, de mê bocje: Zuan al à batiât cu l'aghe, vualtris invezit o sarès batiâts cul Spirtu Sant di chi a pôcs dîs».

Cjatangsi duncje insieme, i an domandât: «Signôr, esal chest il timp che tu tornaràs a meti in pîts il ream di Israel?». Ur à rispuindût: «No us sta a vualtris di savê i tims e i moments che il Pari si à riservât par sè. Ma o cjararès la fuarce dal Spirtu Sant ch'al vignarà parsore di vualtris e mi sarès testemonis a Gjerusalem, par dute la Gjudee e la Samarie e fint ai ultins confins dal mont».

Disint cussì, si alçà par aiar sot i lôr vôi e un nûl ur al strafuì dai lôr vôi. Intant che lui al leve sù, lôr a cjalavin fis il cîl: e ve che si ur presentin dôs personis a blanc che ur disin: «Umign di Galilee, parcè po staiso li a cjalâ il cîl? Chel Gjesù che us è stât strafuît viers il cîl, al tornarà come che lu vês viodût a lâ sù in cîl».

Peraule di Diu.

SALM RESPONSORIÂL

dal Salm 46

Scoltade la leture de Sense, la liturgjie, midiant dal salm responsoriâl, nus invide a fâ grande fieste. Nus dîs: - bateit lis mans - scriulait - dait sù cjantis - parcè che al è lâs sù il Signôr compagnât dal sunôr de trombe, Diu si è plaçât su la sô sante sente.

R. Al va sù il Signôr fra cjantis di gjonde.

Se cjantât: Il cjant dai salms responsoriâi, p. 133.

O ben:

R. Aleluia, aleluia, aleluia.

Batêt lis mans, popui de tiere,

scriulant al Signôr in ligrie.

Parcè che trement al è il Signôr des schiriis, l'Altissim,

lui al è il grant re sun dute la tiere. **R.**

Al è lâs sù Diu framieç dai berlis,

il Signôr compagnât dal sunôr de trombe.

Dait sù cjantis a Diu, dait sù cjantis;

dait sù cjantis al Signôr, dait sù cjantis. **R.**

Lui al è il re di dute la tiere:

une bieles cjante dait sù a Diu.

Diu al à tacât a regnâ sui popui,

Diu si è plaçât su la sô sante sente. **R.**

SECONDE LETURE

Ef 4,1-13

Clamâts al om complet, a chel nivel di svilup ch'al colme la plenece di Crist.

E je une lezion cjpade de letare dal Apuestul a la sô comunitât. Culî lis riflissions a saressin tantis e dutis impegnativis. Prime di dut te comunitât bisugne cirî di mantignî l'unitât dal spirt cul leam de pâs. Il motif, pal cristian, al è plui che clâr. Dopo al ven chel: - al è lâs sù - de Sense di vuê unît a chel: al à dât fûr regâi ai oms. Dopo e rive la conclusion: Al è lui ch'al à distinât un pôcs come apuestui, altris come profetis...

Dit chest, al è come vê dit o pôc o nuie; però il nestri pinsîr al va a lis comunitâts cence predi li che o vin di començâ a rifleti che: a ognidun di nô la gracie e je stade seont la misure dal don di Crist.

De letare di san Pauli apuestul ai Efesins

Fradis, jo, il presonîr pal Signôr, us invidi a vivi une vite degne de clamade che o vês vude, cun dute umiltât e biel trat, cun pazience, sapuartantsi un cul altri cun amôr, preocupâts di mantignî l'unitât dal spirt cul leam de pâs: un cuarp sôl e un sôl spirt, cussî come ch'o sês stâts clamâts a une sole sperance, ch'e je la vuestre clamade; un sôl Signôr, une sole fede, un sôl batisim; un sôl Diu e pari di ducj, ch'al è sore di ducj e al opere midiant di ducj e al è in ducj.

A ognidun di nô però la gracie e je stade dade seont la misure dal don di Crist. Par chel al dîs: "Lant sù in alt al à menât daûrsi sdrumis di presonîrs, al à dât fûr regâi ai oms".

Ma ce vuelial dî ch'"al è lâs sù" se no che prime al jere lâs jù tes regjons plui bassis, vadi su la tiere? Chel ch'al è lâs jù al è simpri chel ch'al è ancje lâs sù parsore di ducj i cîi par jemplâ il mont intîr. Al è lui ch'al à distinât un pôcs come apuestui, altris come profetis, altris come vanzeliscj, altris come pastôrs e dotôrs, par preparâ i sants al ministeri, par fâ sù il cuarp di Crist fin che no rivin ducj a l'unitât de fede e de plene cognossince dal Fi di Diu, al om complet, a chel nivel di svilup ch'al colme la plenece di Crist.

Peraule di Diu.

Secuence

La sequence dal Messâl di Aquilee si presente puntuâl a furnî di poesie cheste solenitât. E vuê nus conte cuntun lengaç popolâr, adat a la int, fats e misteris de Sense.

Tal mût di esponi, ce che par nô al pues semeâ certis voltis masse "naif" al ven recepît come valit e profont se il cûr al è sempliç e net. A son veris ancje te liturgjie lis peraulis dal Signôr: Chel che nol acetarà il ream di Diu come un frut, di sigûr nol jentrarà dentri (Mc10, 15).

SUMMI TRIUMPHUM REGIS

Compagnin la vitorie dal re cu la nestre laude;

lui che, cu la vitorie de justizie, al à tes sôs mans i bastons dal comant dal cîl e de tiere,

lui che si è dât vie a un presit une vore grant par riscatânus nô.

A lui i spiete un non convenient e gloriôs.

Di fat al à scjavaçât cence soste dutis lis monts e dutis lis culinis di Betel.

Dal cîl al è dismantât jù intun grim virgjinâl e di li tal grant mâr dal mont.

Dopo di vêlu navigât dut cu la sô potence, al à dât l'assalt al scûr trement dal flum dal infîer.

Al à savoltade la paronance di chel potent;

al à gjavât fûr di li une grande schirie di int

e cul so sflandôr al inlumine il mont.
Il vincidôr al à menade daûrsi la sdrume
di chei ch'a jerin tignûts presonîrs li dentri,
e cussi, tornât in vite, al pues aromai palesâsi
ai siei servidôrs e amîs.
Vuê infin al à fat il salt plui grant,
svolant par simpri sore dai nûi e dai cîi.
Il popul fedêl ch'al celebri duncje cheste grande zornade
là che il Fi di Diu al à fat jentrâ cun lui,
tes altis sentis dal cîl, i cuarps dai mortâi.
La int e spiete trimant il judiç ch'al vignarà,
come che i doi agnui ur an spiegât ai fradis:
«Chest Gjesù che us è stât puartât sù in cîl,
al tornarà a vignî, come che lu vês viodût a lâ».
Suplichin alore ducj insieme cence mai fermâsi
il Signôr nestri gloriôs;
par che de gjestre dal Pari, là ch'al è sentât,
nus mandî il Spirtu Sant.
Ch'al sedi simpri cun nô, fint a la fin dal mont.

CJANT AL VANZELI

Mt 28,19-20

R. Aleluia, aleluia.

Lait e inscuelait dutis lis nazions, al dîs il Signôr.
Ve che jo o soi cun vualtris ducj i dîs,
fint a la fin dal mont.

R. Aleluia.

VANZELI

Mc 16,15-20

Gjesù al è puartât sù in cîl e al è sentât a la gjestre di Diu.

Marc al conte il fat de Sense cun dôs imagjinis: al fo puartât sù in cîl - si sentà. Si ferme invezit plui a lunc a spiegâ che Gjesù al continue a sedi presint tes comunitâts poiadis su la sô peraule. L'evangjelist al puarte ancje i segnâi de presince dal Signôr: a pararan... a fevelaran... a cjaparan ...se a varan bevût... a metaran lis mans... A jerin i segnâi dai prins cristians; ma in altre maniere ancje vûe la presince dal Signôr si rivele tes personis e comunitâts che a vivin di fede.

Dal vanzeli seont Marc

In chê volte, Gjesù al comparî ai Undis e ur disè: «Lait par dut il mont e predicjait il vanzeli a ogni creature. Chel ch'al crodarà e si fasarà batiâ al sarà salvât, machel che nol crodarà al sarà condanât. E chescj a son i segnâi che a compagnaràn chei ch'a crodin: tal gno non a pararan fûr i demonis, a fevelaran lenghis gnovis, a cjaparan in man sarpints e, s'a varan bevût cualchi velen, no ur fasarà mâl, a metaran lis mans sore dai malâts e chei a vuarissaran».

Il Signôr Gjesù, dopo di vêur fevelât, al fo puartât sù in cîl e si sentà a la gjestre di Diu.

Alore lôr a lerin a predicjâ pardut, biel che il Signôr al operave insieme cun lôr e al confermave la peraule cui spiêi che ju compagnavin.

Peraule dal Signôr.

Si dîs O crôt.

Su lis ufiertis

Signôr, ti presentin cun umiltât chest sacrifici
in memorie de sense venerabil di to Fi;

danus la gracie che, cun chest incuintri di robis santis,
o podin jessi alçâts a lis Realtâts dal cîl.
Par Crist nestri Signôr.

Antifone a la comunion

Mt 28,20

Ve che jo o soi cun vualtris ducj i dîs,
fint a la fin dal mont, aleluia.

Daspò de comunion

Diu onipotent e eterni,
che tu nus lassis celebrâ i misteris dal cîl
biel ch'ò sin ancjemò su la tiere, fâs, par plasê,
che la devozion e l'afiet dal popul cristian a tindin
là che dutune cun te e je ancje la nestre umanitàt.
Par Crist nestri Signôr.

* * *

Riflession di pre Antoni Beline: **S'in va ma no nus bandone**

Un dai vanzei plui curts dal an par une des fiestis plui grandis. Però, in chestis cuatri riis al è dut:
il comant pai apuestui di lâ par dut il mont e di contâur la buine gnove a dutis lis creaturis, cence
diference di culture, o di gjernazie o di sanc. E, tal stes timp, il misteri dal cûr di ogni om...

Vanseli par un popul, an B, p. 83.

Cjants pal timp di Pasche

- Contait la buine gnove, *n. 66;*
- Crist nus da la sô lûs, *n. 158;*
- Victimae paschali laudes, *n. 159;*
- I cristians a cjantin laude, *n. 160;*
- Aleluia... O filii et filiae, *n. 161;*
- Sta legre, sante Glesie, *n. 162;*
- Christ ist erstanden, *n. 163;*
- Crist al è in vite, *n. 164;*
- Cristo risusciti, *n. 165;*
- Grosser Gott, *n. 166;*
- Al Agnel sacrificât, *n. 167;*
- Hvala veçnemu Bogu, *n. 168;*
- Te lodiamo Trinità, *n. 169;*
- Laudate Dominum, *n. 170;*
- O sin resurîts a la vite, *n. 171;*
- Benedete la zornade, *n. 172;*
- Il nestri Redentôr, *n. 173;*
- Si cjanti al Pari laut in cîl, *n. 174;*
- Nei cieli un grido risuonò, *n. 175;*
- O Cristo, sol di Pasqua, *n. 176.*

Salm 94 : Vignît, batìn lis mans al Signôr, *n. 256;*

“ **80** : Gjoldêt in Diu nestre fuarce, *n. 256;*

“ **92** : Il Signôr al regne, *n. 258;*

“ **97** : Cjantait al Signôr une cjante gnove, *n. 261;*

“ **113a** : Cuant che Israel dal Egjit al è jessût, *n. 265;*

“ **113b** : No a nô, Signôr, no a nô, ma al to non dai glorie, n. 266.

Tal libri Hosanna, si puedin cjatâ ancjemò altris cjants e salms adats al timp di Pasche.

* * *

*No sta cirî fûr di te il bon odôr di Diu;
tu finissaressis tune jungle cence sortide.
No tu âs mai di stufâti di cirî Diu dentri di te
e dentri di te, tu tu lu cjarârâs.*

S. Kierkegaard

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*
- * *Par domandâ chescj libris scrîvêt a info@glesiefurlane.org*